

## Èkwo-ozì, Pòlu Deru Nù Ndu Efesòsu

<sup>1</sup> Ọwa-a bụ èkwo-ozì, mụbe Pòlu ede. Mu bụ onye Chileke họtaru mee gè mu buru onye-ishi-ozì Kéreshi Jizòsu. Mu ede iya anụ ndu dunsò, bu lẹ Efesòsu; mbụ ndu kwetarụ kẹ Kéreshi Jizòsu; ẹphe l'iya tũgba buru nanụ.

<sup>2</sup> Mu sụ gè Chileke, bụ Nna anyi yee Nnajiuphu, bụ Jizòsu Kéreshi meeru unu eze-ìphe-ọma; mekwaaphọ g'unu buru l'èhu-guu.

### *Ọnu-ọma, shi l'ẹka Kéreshi*

<sup>3</sup> Unu g'anyi kele onye ono, bụ Chileke bya aburu Nna kẹ Nnajiuphu anyi Jizòsu Kéreshi ekele; onye bụ iya gọru ọnu-ọma nù anyibe ndu anyi lẹ Kéreshi tũgbaru buru nanụ. Ọnu-ọma ono bụ lẹ Chileke meru; anyi shi Kéreshi l'ẹka yiru l'ọha imigwe. Ọ buru ẹka o shi bụ l'ò wotaru iphe, bụkotakpoo iphe, aanụ anunu, shi l'ẹka ono woru nù anyi. <sup>4</sup> Chileke byaru eme mgboko; o vuru ụzo shi l'atũgba ono, anyi lẹ Kéreshi tũgbaru buru nanụ ono; họtahawaro anyi g'anyi buru ndibe iya; k'ọphu anyi a-duru iya iche; bya aburu ndu adudu ẹka ntũcha a-dụ l'èhu anyi l'ìphu iya. <sup>5</sup> Ọo n-yemobu iya meru g'ò gude ọ chihawa iya l'idzù dobe l'anyi a-buru unwu iya; onye oo-shi l'ẹka buru Jizòsu Kéreshi. Ono buerupho iphe, dũhawa iya ree ememe bya abukwarupho iphe dụ iya l'uche; <sup>6</sup> g'anyi etuje Chileke ẹpha k'eze-ìphe-ọma ono, dụ biribiri ono,

o meru anyi ke mmanu ono; mbu anyibe ndu anyi le Nwa iya ono, o yeru obu ono tugbaru buru nanu.

<sup>7</sup> Mbu-a; Nwa iya ono be gbashikwaru mee ya; gude gbata anyi; teme o bukwaru iya pho bu le Chileke aguru anyi nvu l'iphe-eji anyi. Su-a; eze-iphe-oma ono buru iphe-oma, kwatakporu paa aka be o meberu anyi egube ono; <sup>8</sup> mbu eze-iphe-oma ophu o kwatakporu gude mmamiphe yele nkwamenya saa aka okpobe asasa meeru anyi. <sup>9</sup> O byakwapho bya emee g'anyi maru iphe; nweru okpobe egomunggo; k'ophu iphe, oome e-doje anyi enya. O meru; anyi bya amaru iphe, shi buru iphe, o domiru edomi, bu iphe, o rihawaru le ya e-shi Kereshi l'eka mee. <sup>10</sup> Iphe ono, o tuberu ono, bu iphe, oo-me teke o gbaru ono bu l'oo-tuko iphe, o gude aka iya mee tuko chigbabe; mbu iphe, du l'igwe; me ophu du l'ali; l'o woru Kereshi mee ishi iya.

<sup>11</sup> Oo Kereshi be anyi l'iya tugbaru; o buru iya meru g'anyi yiru l'iphe ono, o kweru ndu bu nkiya ukwe iya ono. O buru iya mekwarupho g'o gude Chileke, emekotaje iphemiphe g'o tubehawaru iya; mee ya g'o du iya l'uche; vuhawaru uzo hotahawaa anyi. <sup>12</sup> Oo ya bu g'anyibedua, bu ivuzo ele enya Kereshi egude umere anyi l'ophu egoshi g'odu-biribiri Chileke habe shii; g'ee-gude iya jaa ya ajaja.

<sup>13</sup> Nokwapho g'o du unubedua; l'unu numaerupho okpobe ozi ono, bu ozi k'adzota ono, Chileke dzotaru unu ono; unu kweta ke Kereshi. O buru iya bu le Chileke egude

Unme-dụ-Nsọ, o kwetaru ukwe iya; mee unu iphe-ọhubama; gude goshi l'ọo ya nwe unu. <sup>14</sup> Unme-dụ-Nsọ ono egoshi l'anyi a-nata-a iphe ono, Chileke kweru ndibe iya ukwe iya ono, bu iphe, anyi a-nata teke Chileke a-gbata ndibe iya ọkpobe agbata ke mkpochi-ishi; g'anyi jaa ọdu-biribiri iya ajaja.

### *Pọlu epfu anụ Chileke*

<sup>15</sup> Noo iphe, meru g'o gude mu nımachaa k'ekwekwe unu kweru ke nnajiuphu, bu Jizosu waa k'obu unu yekotaru ndu-nsọ ono; <sup>16</sup> ebe o dudu teke mu ekelebuhjeru unu Chileke ekele. Mu -nọdu epfu anụ iya; be mu epfujekwaru iya pho opfu ehu unu. <sup>17</sup> Mu asuje ge Chileke ke Nnajiuphu anyi Jizosu Kereshi; mbu Nna bu O-ka-le-biribiri; g'o nu unu Unme iya, e-me unu g'unu maru mmamiphe; phu ophulenyia; k'opu unu a-maru iya ọkpobe amaru. <sup>18</sup> Mu asujekwa iya pho g'o mee obu unu g'o huma iphoro iya; k'opu unu a-maru iphe, bu iphe, o kuru unu g'unu le enya iya; makwarupho l'iphe, o kweru ndu-nsọ ukwe iya nyiberu anyibe. <sup>19</sup> Wakwapho g'ike iya ono, bu ike ophu enwedu etu ono emeberu ire l'ehu anyibe ndu kweru ke Jizosu. Ike ono, l'eme ire l'ehu anyi ono be bukwa iphe lanu yee eze ike iya ono, <sup>20</sup> bu iya bu ophu o gude mee ge Kereshi shi l'onwu teta dzuru ndu; bya eworu iya dobe l'ekutara iya l'imigwe. <sup>21</sup> Kereshi ono no-ngokotaru iphe, bukotakpoo ochi-oha imigwe; mekpoo o-no-l'oke-okwa imigwe g'ephe ha; mekpoo o-gude-ike imigwe g'ephe ha; mekwapho nnajioha

imigwe l'ophu; mękpoo iphe, bukpoo iphe, e kuru ępha l'eliphe-a; mękpoo l'eliphe ophu abya nu. <sup>22</sup> Chileke meru ę Kęreshi tuko iphemiphe zopyabe l'okpa; bya ewokwaru iya pho yeru Chiochi g'ọ buru iya l'a-buru ishi iphemiphe kpo. <sup>23</sup> Chiochi l'ophu bukwa ogwehu Kęreshi; o buru l'echilabo ndu Chiochi be iphe ke Kęreshi dzuru edzumedzu. O bukwannuru le Kęreshi be iphemiphe ke Chileke dzukwannuru edzumedzu.

## 2

### *Eshi l'onwu bahu le ndzu*

<sup>1</sup> O duru teke unu shi buru ndu nwuhuru anwuhu. O buru iphe, kparu iya nu bu l'unu te eyejeduru Chileke onu; unu nodu anoduje eme iphe-eji. <sup>2</sup> Teke ono be unu shi etso aka ndiphe. Unu shi anoduje eme iphe, epherephere pfuru, bu iya bu onye ophu, bu onye-ishi l'ephekerephe bya aburu obvu ono, l'emeje ę nemadzu kwefuru Chileke ike ono. <sup>3</sup> Anyibedua g'anyi ha shikwa tuko etso uzo ono. Anyi shikwa etsoepho iphe, agu anyi egu ememe. Iphe, anyi shi emeje buerupho iphe, du anyi ree l'ehu; me iphe, du anyi ree l'egomunggo. Anyi shikwa le mbu buru ndu shi tukotawaa oke-ehu-eghu ke Chileke kpube onwanyi ę ndu ophuunapho.

<sup>4</sup> Obenu le Chileke bu onye aphuje obu-imemini; phua k'etsutsu iya. O yeru anyi obu yegharu iya anyi aka. <sup>5</sup> Anyi shi l'emeswe, anyi mesweru Chileke; buru ndu nwuhuru anwuhu. Obenu le Chileke mewaru; anyi le Kęreshi tuko bya adzuru ndzu; o buru eze-iphe-oma iya be o

gude dzoo unu. <sup>6</sup> Anyi lẹ Kéreshi Jizosu tugbaru buru nanu; Chileke tuko anyi l'iya mee; anyi teta dzuru ndzu bya emekwapho g'anyi l'iya tuko nodu l'imigwe. <sup>7</sup> Iphe, o gude mee ya nno bu g'oo-mecha goshi ogbo ophu no l'iphe eze-iphe-oma iya ophu nyiberu oke anyibe; waa g'oo-goshi phe g'obu omaa ya, shi l'eka Kéreshi habe l'ehu anyi. <sup>8</sup> Oo l'oo lẹ Chileke menukaru eze-iphe-oma meru g'o gude o dzoo unu. Adzodzoo ono shi l'ekweta, unu kwetarū kẹ Kéreshi; o to bukwa unu be o shi l'eka; o buepho iphe-oma, Chileke meru unu kẹ mmanu; <sup>9</sup> ophu o budu iphe, e setaru l'akanya; g'o to dukwanu onye e-gude iya wata eku onwiya. <sup>10</sup> Anyi tukokwaru buru iphe, Chileke gude eka iya mee. O shi Kéreshi Jizosu l'eka kee anyi; k'ophu anyi a-duje ike je okpobe ozi, o kwakobehawaru anyi g'anyi jee.

### *Aburu nanu l'ime Kéreshi*

<sup>11</sup> Oo ya bu; unu nyatakwa iphe, unube ndu abudu ndu Jiu shi buhawaru. Ndu Jiu shi ekuje unu akpapyi. Epehedua nodu ekuje onwophe ndu buru ubvu. Ole ubvu, ephe buru buepho iphe, nemadzu gude eka ebu l'eli eh. <sup>12</sup> Unu nyatajeka lẹ teke ono be unu te eshidu nodu Kéreshi l'eka; unu shi buru ndu ohozo, a gufuru agufu lẹ ndu Izurelu teme unu buru mbyambya, ophu unu eshidu du l'ukwe-iphe, Chileke kweshiru ndibe iya ono. Ophu o dudu iphe unu shi ele enya iya lẹ mgboko-a. Ophu unu eshidu maru onye Chileke bu. <sup>13</sup> Obenu lẹ nta-a be o shiwaa l'eka Kéreshi; onye unu

l'iya tugbaru buru nanu; Chileke kuritaru unu ntse; l'unube ndu shi nodu iya uzanya; o buru mee Kereshi be e gude mee ya. <sup>14</sup> O kwa Kereshi l'onwiya bu ehu-guu k'anyi; yebedua, meru anyibe ndu Jiu me ndu abudu ndu Jiu; anyi buru ndu lanu. Tobudu iya bu; o shi egube ono nwukpofu ndumashi ono, shi buru igbulu no-buha anyi l'unu ono. <sup>15</sup> Iphe, o meru bu l'o meru; ophu ekemu erehedu ire; mbu ekemu ndu Jiu mekpoo nsu nsu; me omelali omelali, dukota iya nu. Iphe, Chileke eme g'o mee bu ge Kereshi e-shi egube ono gude mba labo ono metaru onwiya ndu lanu, ephe l'iya tugbaru buru nanu. Ndu ono aburu mbà ophuu. Oo ya bu l'o gude egube ono mee ge nchi du doo. <sup>16</sup> Kereshi egudekwapho anwuhu ono, o nwuhuru l'oswebe ono; mee ge ndumashi ono bu. Oo ya bu; g'o gude anwuhu iya l'oswebe ono; mee ge mba labo ono buru nanu. Oo ya bu g'ooduphuta phe azu dupfuta Chileke. <sup>17</sup> Noo iphe, Kereshi gude bya; bya ezidzuru g'a ha ozi-oma nchi-adu-doo ono; zia ya unube ndu shi nodu Chileke uzanya; zikwaa ya pho ndu shi nodu iya ntse. <sup>18</sup> Kele o bu iya be o shi l'eka anyinebo tuko buru ndu aduje ike gude Unme lanu bya apfuru l'iphu Nna.

<sup>19</sup> Oo ya bu; l'unu ta abuhedu nlwamulwa; ophu unu abuhedu ndu ohozo. Nta be unu buwaa ndu ephe le ndibe Chileke tukoru buru ndu a nwuru l'eka lanu; unu tukowaru buru ndu onu-ulo Chileke. <sup>20</sup> Nta-a be Chileke gudeakwa unubedua akpu-tse ulo iya ophu ndu-ishi-ozu me ndu shi epfuchiru Chileke turu okpa iya. O buru Kereshi Jizosu l'onwiya bu mkpuma, gude ulo

ọbu. <sup>21</sup> Ọo ya bụ onye gude ọlo ono g'ọ ha gudeshia ya ike bya aburu iya e-me g'o vua buru eze-ọlo, e doberu Nnajiuphu nsọ. <sup>22</sup> Nokwaphọ g'unu l'iya tųgbaru; ọ tųkokwapho unu akpu; unu lẹ ndu ọzo g'a kpua unu akpukpu g'ulo; g'unu buru eze-ọlo, Chileke e-shi l'ẹka Unme-dụ-Nsọ buru.

### 3

#### *Ozi, Pọlu ejeru ndu abudu ndu Jiu*

<sup>1</sup> Noo g'o gude mube Pọlu, onye nọru Kéreshi Jizosus mkpọro l'iswi ẹhu unube ndu abudu ndu Jiu; nọdu anọduje epfu anụ Chileke. <sup>2</sup> O doru mu ẹnya l'unu nọmawaru lẹ Chileke shiwaa l'eme eze-iphe-ọma iya ono; ye mu ozi-a l'ẹka sụ gẹ mu jee; g'ọoduru unu lẹ ree. <sup>3</sup> Ono buru iphe, e domiru edomi e meru gẹ mu hụma l'ọphulenyaa. Gẹ mu dehaawaru iya unu lẹ mbụ; ọle mu gburu iya mkpirikpu. <sup>4</sup> Unu -gụephe iphe, mu dehawaru; unu agbe l'ẹka ono maru g'o doberu mu ẹnya; mbụ iphe ke Kéreshi ono, e shi domia edomi ono. <sup>5</sup> Lẹ teke ndiche be Chileke te eshikwa emeje gẹ ndiphe maru iphe nkiya ono, o domiru edomi ono. Obenu lẹ Chileke shiwaa l'ẹka Unme-dụ-Nsọ nkiya togbo iya ẹba nta; k'ọphu ndu ọ họtaru dobe iche; mbụ ndu-ishi-ozii iya me ndu mpfuchiru iya a-maru iphe ono. <sup>6</sup> Mbụ lẹ ndu abudu ndu Jiu be ẹphe lẹ ndu Jiu gbawaa mgba l'ọnu-ọma ọphu shi l'ẹka Chileke. Ẹphe tųkoru dzepfuwaa l'ẹhu onye lanu; tųko yiwaru l'ukwe-iphe, Chileke shi l'ẹka

Kéreshi kwee. Ọ búru ozi-oma ono meru g'anyi maru iya nta.

<sup>7</sup> Ọo ozi-oma ono bẹ mu ese akanya iya. Chileke hotaru mu gẹ mu jeje ozi-oma ono; ono búru eze-iphe-oma, o meru mu kẹ mmanụ. O gude nno goshi mu g'ike iya erebe ire l'ẹhu mu. <sup>8</sup> L'iphe, bukpuo ndu ẹnya lwaru lẹ ndu kẹ Chileke bu mu bẹ ọ kachaa alwalwa; ọ buleru mbẹdua-a bẹ Chileke gbẹ meeru eze-iphe-oma ono kẹ gẹ mu búru onye e-tsoru ohamoha; pfukashiaru ndu abudu ndu Jiu k'eze-iphe-oma ono, shi l'ẹka Kéreshi ono paru ẹka; k'ophu nemadzụ ta asudu g'oo-rivu g'ọ habe. <sup>9</sup> Ọo mu bẹ o yeru gẹ mu mee gẹ ndiphe l'ophu huma gẹ Chileke eshije eme iphe, ọ tuberu. Chileke onye bu iya meru iphemiphe chihawaru iphe ono; teme o mee mgboko; ọle o shikpọepho e-shi teke ono domia ya edomi. <sup>10</sup> Ọ búru nta-a bẹ Chileke shi Chiochi l'ẹka mee gẹ ndu ọchi-oha imigwe; mekpoo ndu ọ-nọ-l'oke-ọkwa imigwe maru gẹ mmamiphe Chileke gbaẹbekotaru. <sup>11</sup> Chileke tukoru iphemiphe ono mee g'ọ riru iya ro l'edenwede. Ọ búru onye o shi l'ẹka mee ya bu Nnajiuphu anyi, bu Kéreshi Jizosu; <sup>12</sup> onye anyi kwetaru nkiya bya emee; anyi l'iya tugba búru nanu; k'ophu obu te eteedu anyi ophe; anyi nweru onu-opfu; teme anyi nweru ẹka anyi a-pfuru pfushia ike l'iphu Chileke. <sup>13</sup> Noo g'o gude mu nodu epfuru unu su: jiko g'unu te egudekwa k'iphe-ẹhuka-a, mu eje l'opfu ẹhu unu-a; tuwoo Kéreshi ẹka; l'ọ bukwa iphe e-wotaru unu ubvu.

*Eye obu, Kéreshi yeru anyi*



14 Oo iphe ono meru g'o gude mu nõdu anõduje egbu ikpere l'ali epfu anu Chileke, bu Nna; 15 onye bu iya be ipfu l'ipfu l'imigwe me l'eliphe shi l'eka gbube ishi ndzu phe. 16 Mu anõduje epfu anu Chileke g'o shi l'odu-biribiri iya, nyiberu anyibe gbẹ l'eka Unme iya, du Nso; nu unu ike g'obu shihu unu ike; 17 ge Kereshi bata bya eburu unu eburu l'ime obu; eshinu unu kweru nkiya; wafua g'eye obu mee unu g'unu gbaa ogbarabvu nguru anguru; 18 g'unu le ndu-nso g'ephe hakota aduje ike g'o doo unu enya; mbu ge adzota, Chileke dzotaruru unu habe osa; waa g'ogologo iya habe; me g'o habe l'eli; mekpoo omilomi iya; 19 g'unu makwarupho le n-yemobu ke Kereshi paru eka; k'ophu o dudu onye abya iya amaaberu. Oo ya bu g'aatuko ge Chileke gbaru; humagbukotakpoo l'ehu unu.

20 Chileke aduje ike meeru anyi iphe megharu iya eka mebyikpo o kpobe emegharu; mbu mechaa meghata g'anyi aduje ike su g'o mee; mechaa mee ophu anyi ari-vuduru l'egomunggo. Egube ike owa-a, o gude ere egube ire owa-a l'ehu anyi-a shihukwaru ike. 21 G'e shi Chiochi l'eka tuje iya epha; shikwapho l'eka Kereshi Jizosu tuje iya epha jasus le tuutuutu le mimiimii. Nokwa g'o du.

## 4

### *Ndu etso Jizosu bu nanu*

1 Noo g'o shitaru mbedua, bu onye a turu mkporo; opfu le mu ejeru Nnajuphu ozi-a nõdu arwo unu su g'unube ndu ke Chileke dzuru ndzu

meje iphe, Chileke tũberu teke ono, ọ họtaru unu ono. <sup>2</sup> Unu wozejekwa onwunu ali; unu emeje gelee bya aburu ndu atajeru iphe nshi; ndu atagbuje iphe nwibe unu meru unu le nshi; gude egube ono goshi l'unu yeru nwibe unu obu. <sup>3</sup> Unu kukebeje ẹhu g'unu ta aha aburu nanu ono, Unme Chileke meru g'unu buru ono. Ge Chileke mee ge nchi du unu doo g'unu le nwibe unu aburu nanu. <sup>4</sup> Su-a; ọ kwa ogwehu lanu du; waa Unme-du-Nso lanu; nokwapho g'ọ bu iphe lanu be Chileke kuru anyi g'anyi le enya iya. <sup>5</sup> Oo Nnajiuphu lanu du; ọ buru ekweta lanu du; nokwapho g'ọ bu baputizimu lanu du. <sup>6</sup> Oo Chileke lanu du; onye bu iya bu Nna anyi g'anyi ha; bya aburu iya no-ngokotaru; bya egudekota onyemonye eje ozi iya; bya eburu l'ime onyemonye.

<sup>7</sup> G'anyi ha l'onye l'onye be Chileke mekotaru eze-iphe-oma. O buru ge Kereshi gude kee ya bu g'anyi natagbaaru iya. <sup>8</sup> Noo iphe, o gude o su:

“Teke ono, ọ gbeshiru lashia  
l'imigwe  
be o dutaru igwerigwe ndu  
ọ kpuru le ndzu lashia;  
bya ekèeru ndiphe iphe  
ke mmanu.”

<sup>9</sup> O du ree; ọ -buru l'a suru l'ọ laru l'imigwe; ọ n'iya bu l'o vuru uzo shiada l'igwe bya mgboko rwua l'ali ree. <sup>10</sup> O kwapho yebe onye ono, nyizetaru nu ono; nyihuru; tuko imigwe g'ọ ha nyighaa; k'ophu ọ tukoru ekameka sweta. <sup>11</sup> Oo ya bu onye turu aka le ndu a-buru ndu-ishi-ozu; ta aka le ndu ophu a-buru ndu mpfuchuru

Chileke; mę ndu ophu a-buru ndu-ozı-oma; mę ndu ophu a-nođuje eleta Chiochi ęnya bya atukwapho ęka lę ndu ophu a-nođuje ezi opfu Chileke. <sup>12</sup> Iphe, o gude mee ya nno bu g'o shi phe l'ęka mee ndibe Chileke; k'ophu ęphe a-du ike jeeru Kęreshi ozi-a; wafua k'ophu ogwehu Kęreshi ono e-tsehu etsehu. <sup>13</sup> Noo g'oo-du jasu teke anyi a-tuko buru ndu tugbaru nanu; opfu l'anyi tukoru kweta kę Nwa Chileke ono; mę opfu l'anyi majiru iya ęnya. Noo iphe, e-me g'anyi bukwarupho ndu e-tsefuta; buru mkpurophu onye lanu, dzuru oke l'ime Kęreshi. <sup>14</sup> Anyi taa bueduru unwegirima, a-nođuje akwaphu akwaphu; ndu e gude iphe opfu, shi l'ęjo nzi ęphe anođuje ezi; gude ęregede mę ugho edepushi. <sup>15</sup> Iphe, anyibedua g'emeje bu g'anyi yeje nwibe anyi obu; pfuje ire-lanu; g'anyi egudeje ęgube ono evu evuvu l'iphemiphe; evu evupfu Kęreshi, yębedua bu iya bu ishi anyi. <sup>16</sup> Oo ya emeje g'ogwehu l'ophu dzepfua lę nkwo iya lę nkwo iya; buru nanu. Teke ono bę ogwehu l'ophu a-tuko evu evuvu; shihu ike; eshinu iphemiphe, e meru; o du l'ęhu tukoru emegbaa g'ọ gbaru iya. Nokwapho g'oo-du l'ęhu Kęreshi mę ndu nkiya -yee nwibe phe obu.

### *Ndzu ophuu, shi l'ęka Kęreshi*

<sup>17</sup> Oo Nnajiuphu bę ziru mu nu gę mu pfua ya pfushia ya ike su gę ndzu unu ta aduhekwa gę kę ndu ta amadu Chileke; ndu egomunggo swehuru; <sup>18</sup> ndu oriri phe gbakotaru ochii; teme ebufu phe gę ndzu ono, shi l'ęka Kęreshi ono te erwube phe ęka. O buru iphe, kparu

iya nù bụ l'èphe kpòchiru òkpoma; òphu ò tọ dudu iphe kẹ Chileke, duru òphu èphe maru. <sup>19</sup> Iphere bvụwaru phẹ l'iphu; èphe woru onwophẹ togboru umere, rehuru erehu. Èphe wata eme okorokoto iphe, adudu ree; k'òphu èphe ajiwa momomo ala l'arwụ urwuali, dughbaa iche iche.

<sup>20</sup> O tọ bukwa egube iphe ono bụ iphe, unu nwutaru lẹ kẹ Kéreshi! <sup>21</sup> Ophu doru ẹnya bụ l'unu nūmaru kẹ nkiya; teme e zikwaaphọ unu iphe, bụ òkpobe-opfu, dū l'èhu Jizòsu. <sup>22</sup> Oo ya bụ g'unu haa èjo umere ono, bụ akahụ onye, rehuru erehu ono, bụ iya meru èbe unu amadụ l'òo onwunu bẹ unu aghọru ụgho; ò bukwaru iya phọ emeje; unu alaa l'iswi. <sup>23</sup> Gẹ Chileke mee obu unu; mẹ uche unu g'ò buru iphe òphúú. <sup>24</sup> Unu yeta umere òphúú ono g'onye yetarụ uwe, bụ iya bụ umere òphu Chileke meru o yee ya. Egube umere ono egoshije onwiya l'òkpobe ndzụ, pfulu ọto bya adụ Chileke ree.

<sup>25</sup> Oo ya bụ; unu ta adzuphehẹkwa ụka. G'onnyemonye pfujeru nwibe iya ire-lanụ; eshinu anyi tukuru dzezfua l'ogwehu lanụ. <sup>26</sup> Èhu -ghuahaa unu eghu; unu te ekwekwa g'èhu-eghu ono kpatarụ unu eme iphe-èji. Ophu ò dukwa onye e-kweje g'èhu ghua ya eghu jasụ gẹ nchị jihu. <sup>27</sup> Unu te ekwekwa gẹ Nsetanu kpata unu ụzo l'èhu. <sup>28</sup> G'onye shi ezi iphuru; haa iphuru; gude ẹka iya wata ese akanya gude setajẹ iphe l'ụzo, pfulu ọto g'oo-gudeje nno eyeru ndu ọzo, nọ lẹ mkpa ẹka. <sup>29</sup> Unu te epfujekwaru nwibe unu èjo opfu. O chikwa opfu oma bụ iphe, e-

shije unu l'onu, bu iya bu egube opfu emetse nemadzū emetse; bya akwoje ndu nūmaru iya nū lē mkpa. <sup>30</sup> Unu te emekwa Unme-dū-Nsọ kẹ Chileke iphe aphū. Kẹle ọ kwa Unme-dū-Nsọ ono bẹ Chileke gude mee unu iphe-ohubama dobe; kwaberu mboku, ya a-gbata unu. <sup>31</sup> Unu tūkokpo k'ẹhu nkōnko; mẹ obu ọku; mẹ ẹhu-eghu parū haa. Unu haa arachije nwibe unu nchị; mękpoo ephu iphu. Ọphu unu edobejekwaru nwibe unu ẹjo obu g'ọ dūhabe. <sup>32</sup> Ọ chia g'unu mejeru nwibe unu odoo; phujeru phẹ obu-imemini. Unu agujeru nwibe unu nvu; egube Chileke shi Kéreshi l'ẹka gūaru unu ono.

## 5

### *Umere, gbaru ndu kẹ Kéreshi*

<sup>1</sup> Eshi ọphu unu bu unwu Chileke, o yeru obu; unu nwūje ẹka iya g'unu adū g'ọ dū. <sup>2</sup> Gẹ ndzū unu g'ọ ha goshije l'unu yeru nwibe unu obu egube ono, Kéreshi yeru anyi obu; mĩa ẹnya lẹ ndzū iya l'iswi ẹhu anyi; woru onwiya gweeru Chileke ẹja, dū Chileke ree.

<sup>3</sup> Sū-a; eshinu unu buwaa ndibe Chileke bẹ ọ tọ gbaduru g'unu ye ẹka l'apharwūshi onwonye mẹ ẹjo ememe ililekpọo. Unu te edobekwa ẹnya-pfūrupfuru l'ẹka iphe nwibe unu nọ; ẹbe ọ dukwa ẹjo-iphe ono, unu e-jejekpọ ephota ephota ilile l'ẹka unu nọ. <sup>4</sup> Ọphu ọ dukwa teke unu e-pfuje ẹjo epfupfu; ọzoo tūkpọ tūkpọ opfu; ọphu unu atujekwa ẹjo ntū-onu. Ọ chia iphe, unu e-meje bu g'unu nọduje ekele Chileke ekele. <sup>5</sup> L'ọphu unu a-tube nvọ bu l'ọ

tọ dudu onye arwu urwuali; ozoo onye eme ejo ememe; ozoo onye enya-pfurupfuru, abya abahu l'eka Kereshi waa Chileke bu eze. Onye enya-pfurupfuru du g'onye agwa iphe.

<sup>6</sup> Unu te ekwekwa g'o duru onye e-gude mkpokoro opfu dephua unu. O kwa iphemiphe ono bu iphe, e-me ge Chileke tukoshi ndu te eyejeduru iya onu oke-ehu-eghu iya. <sup>7</sup> Oo ya bu; g'unu l'ephe ta swijekwa oswi. <sup>8</sup> Unubedua l'onwunu shi nodugbaa l'ochii; ole nta-a, unu buwaa ndibe ke Nnajiuphu-a be unu noakwaa l'iphoro. Oo ya bu g'unu meje umere, e-goshi l'unu bu ndu no l'iphoro. <sup>9</sup> Kele iphe, iphoro akpataje buepho okpobe eme oma; me apfubekoto; me ire-lanu. <sup>10</sup> Unu kukebeje ehunwuje eme iphe, du Nnajiuphu ree. <sup>11</sup> Unu te etsokwa ndu ono, l'eme iphe, abaduru urwu, bu iphe, ndu no l'ochii emeje ono. Unu wojechiaru iphe ono, ephe emeje ono tujeru phe jalaa l'iphu. <sup>12</sup> L'iphe ono, ephe anoduje eme lempya ono duta-beru eji k'ophu iphere iya te ekwekpodanu g'e je iya ephota ilile. <sup>13</sup> Teke e wofutakotawaru iphemiphe l'iphoro be a humakotawaru g'o gbaru; <sup>14</sup> kele iphemiphe, bukpoo iphe, e wofutawaru l'iphoro be buwaa iphoro l'onwiya. Noo g'o gude a nodu epfuje su:  
 "O-ku-mgbenya;

tehu nwuru enya!

Shi l'anwuhu,

i nwuhuru teta

gbalihu!

Ge Kereshi buru iphoro  
 chiahaa l'ehu ngu."

<sup>15</sup> Oo ya bu; unu kwakwa ɛnya l'egube umere, unu emeje nta. Unu meje ge ndu maru iphe; te emehẹ ge ndu amadu iphe. <sup>16</sup> Teke o duru nwuzo, unu kpataru k'eme iphe, du ree; unu ta ahajekwa iya g'o laa l'iswi; opfu l'iphe-eji paakwaru eka le mgboko nta. <sup>17</sup> Oo ya bu; unu ta abuekwaru ndu eswe. Unu seje g'unu maru iphe, du Nnajiuphu ree g'unu meeru iya.

<sup>18</sup> Unu ta angujekwa mee k'opfu oo-tsu unu atsutsu; kele oodubaje l'iphere abvu l'iphu. O chikwaa iphe, unu e-meje bu g'unu kwe ge Unme-du-Nso ji unu ehu. <sup>19</sup> Unu gudeje ebvu oma; me ebvu ekele; me ebvu ozowaro, shikota le Unme-du-Nso gude pfuru nwibe unu opfu. Unu gujeru Nnajiuphu ebvu ekele; unu agujekwaru iya pho ebvu oma. Unu egudejek-wapho obu unu kele iya ekele. <sup>20</sup> Unu gudeje epha Nnajiuphu anyi, bu Jizosu Kereshi keleje Chileke, bu Nna ekele k'iphemiphe.

### *Umere, gbaru nwoke yelee ya*

<sup>21</sup> Unu wozejekwa onwunu ali l'eka nwibe unu no; gude nno goshi l'unu kwaberu Kereshi ubvu.

<sup>22</sup> Unube unwanyi; unu wozejekwa onwunu ali l'iphu ji unu; g'o bu Nnajiuphu, bu Kereshi be unu emeru iya. <sup>23</sup> L'o kwa nwoke bu ishi nyee ya egube o bu Kereshi bu ishi Chiochi; bya abukwarupho Onye-Ndzota ogwehu iya ono. <sup>24</sup> O kwapho ge Chiochi wozeru onwiya ali l'iphu Kereshi bu g'unwanyi e-wozeje onwophe ali l'iphu ji, alu phe nu l'iphemiphe.

<sup>25</sup> Unube unwoke, unu yeje nyee unu obu ge Kereshi yeru Chiochi; woru ndzu iya nu

opfu ẹhu Chìochi. <sup>26</sup> Iphe, o gude mee ya bu g'òo-bùru: o -gudechaa mini yẹe opfu onu iya saa Chìochi ọ dọ ree; l'oogude iya mee ya g'ọ dọru Chileke iche; <sup>27</sup> k'ọphu oo-kulataru onwiya Chìochi gẹ nwanyị, eje alọ ji; mbụ nwanyị ama mma, adọdu iphe, takuru iya l'ẹhu; ọphu iphu te esedu iya ẹli; mẹ iphe ọzo, dukpoo ẹgube ono; bya adọru Chileke iche; ẹbe ọ dọdu ẹka ọta dọ iya l'ẹhu ilile. <sup>28</sup> Nokwaphọ g'unwoke e-yeje nyee phẹ obu g'ẹphe yeru onwophẹ. Nwoke, yeru nyee ya obu buakwaa onwiya b'o yeru obu. <sup>29</sup> Ọ tọ dọdu onye akpoje ẹhu iya ashị. Ọ chia iphe, oomeje bu àzùzù bẹ ọonoduje azọ iya; eleta iya ẹnya. Nokwaphọ gẹ Kéreshi emejeru Chìochi. <sup>30</sup> Kẹle ọ kwa anyi bugbaa mpfukashi, dọ l'ogwẹhu iya. Anyi bu anu-ẹhu iya mẹ ọkpụ iya. <sup>31</sup> "Noo g'o gude nwoke je l'aha ne iya; haa nna iya je; yẹle nyee ya atugba. Ẹphenebo atuko buru onye lanu." <sup>32</sup> Iphe ono buru iphe, e shi domia edomi. Iphe, mu epfu opfu iya ono bu kẹ Kéreshi yẹle Chìochi. <sup>33</sup> Ọle oopfukwaruphọ unu l'ẹhu l'ẹhu; sọ l'onyenọnu yefutajẹ nyee ya obu g'o yeru onwiya; gẹ nwanyị nonu goshije lẹ ji iya dọru iya lẹ nsọ.

## 6

*Umere, gbaru unwegirima mẹ ndu nwuru phẹ nu*

<sup>1</sup> Unubẹ unwegirima; unu mejekwa iphe ndu nwuru unu, kweru kẹ Kéreshi sọru g'unu mee. Kẹle ọọ iphe, dọ k'ememe bẹ ọ bu. <sup>2</sup> "Kwabẹje ne ngu lẹ nna ngu ùbvù;" bu iya bu ekemu mbụ,



Chileke kweru ukwe-iphe tukobe. <sup>3</sup> “G’o-o-duru ngu lẹ ree waa g’ikakwapho nka lẹ mgboko-a.”

<sup>4</sup> Ndu bu nna; unu te emejekwa unwegirima unu iphe e-ghu phe eghu. O chikwa iphe, unu e-meje bu g’unu zije phe iphe; hùje phe ahùhù l’uzo ke ndu bu ndibe Kéreshi.

*Ndu bu ohu yee ndu nwe phe nu*

<sup>5</sup> Unube ndu bu ohu; unu mejekwa iphe ndu bu nnaji unu k’eliphe-a ziru unu. Unu gudejekwa ndzu-agugu; me obu awa mini me iya. Unu gudejekpoephe obu iphóro me iya; g’unu emeru iya Kéreshi. <sup>6</sup> O to bukwapho teke ephe ele unu enya be unu emeje iya g’ee-shi g’ephe ajaa unu ajaja. O chia g’unu gudeje obu unu meje iphe, du Chileke ree, bu iya bu iphe, gbaru ndu bu ohu Kéreshi. <sup>7</sup> G’ehu tsojekwa unu utso g’unu je ozi unu l’unu bu ohu ejeru Nnajiuphu, bu Jizosu ozi; o to budu nemadzu mmanu be unu ejeru iya. <sup>8</sup> Unu nyatajekwa le Nnajiuphu, bu Jizosu l’e-bu onyemonye obunggo iphe, du ree, o shi emeje; me ?i bu ohu-o; me ?i bu amadu-o.

<sup>9</sup> Unube ndu bu nnaji; unu mejekwarupho ohu ge mu suru g’ephe mejeru unu ono. Unu hakwaa phe eye ebvu. Unu nyatajekwa l’unu l’ohu unu tukoru nweru Nnajiuphu lanu l’imigwe. Yebdua be onyemonye ha enya nhamunha l’iphu iya.

*Ngwogu, Chileke anuje unu*

<sup>10</sup> Iphe, mu e-gude kpochia ya ishi unwunna mu bu; unu noshia ike l’eka Nnajiuphu; g’ike iya, nyiberu anyibe mekwa unu g’unu shihu ike. <sup>11</sup> Unu toko ngwogu, shi l’eka Chileke kwaa

onwunu; g'unu adukwanu ike pfulu pfushia ike l'ejo ugho ke Obutuswe. <sup>12</sup> L'ọ to bukwa nemadzu mmanu be anyi l'ephe alwu ogu. Ndu anyi l'ephe alwu bukwa ndu ochi-oha imigwe; me ndu o-no-l'oke-okwa imigwe; me ndu imigwe, nwe mgboko owa-a, agba ochii-a; mekpoo igwerigwe ejo ojogu, nokota l'imigwe. <sup>13</sup> Oo ya bu; unu chilikota ngwogu ono, shi l'eka Chileke ono g'o ha! Oo ya bu; ejo mboku ono -rwuepho g'unu adu ike pfulu pfushia ike; mbu unu -lwughechaa ya; unu akpo abara g'unu kporu.

<sup>14</sup> Su-a; unu kwakobe! Unu woru ire-lanu kee onwunu l'upfu. Unu eworu apfubekoto mee uwe-igwe ndu l'eje ogu. <sup>15</sup> Unu gudeshia ozi-oma k'ehu-guu ono g'o buru akpokpa, unu yeru g'eturu ata alodu unu. <sup>16</sup> Unu gudefukwaapho ekweta, unu kwetaru ke Jizosu g'o buru iphe unu e-gbobeje gude zeru onwunu; gude iya nashije apfu, Onye-Njo ono, bu Obutuswe agba unu; mbu apfu ono, enwu oku, shi l'eka Nsetanu. <sup>17</sup> Unu anata ndzota dobe g'o buru okpu-igwe, unu e-kpuru. Unu atsua opfu Chileke l'eka g'o buru ogu-echi, Unme Chileke yeru unu l'eka. <sup>18</sup> L'iphemiphe ono be unu a-noduje epfuru Chileke su g'o yeru unu eka. Unu pfuje-kpøkwapho nu Chileke ge Unme-du-Nso edu unu. Noo g'o gude unu je l'anwujeru enya mkpurumkpuru. Unu ta ahakwa epfu anu Chileke l'iswi ehu ndu-nsò. <sup>19</sup> Unu pfujekwarupho nu Chileke k'opfu ehu mu; ge mu saje opfu kpaa kpaa; me mu -nodu epfu iphe, e

domiru edomi ono, ɔ̄ ɔ̄zi-oma ono. <sup>20</sup> Ọo ese iswi ọzi-oma ono be o gude mu bu ru onye no-chiru Jizosu; egudekwaro le nta-a be mu no le mkporo. Noo iphe, mu epfu su g'unu pfuje nu Chileke ge mu nweru obu saje ọzi-oma ono kpaa kpaa g'o gbaru ge mu saa ya.

*Ekele, Ọolu gude akpochi iya ishi*

<sup>21</sup> Mu mawaru l'oo-du unu g'unu maru ge mu eme ala l'eka-a. Nwanna anyi Tikikosu, anyi yeru obu; mbu onye e gude ire iya eka l'eje ozi ke Kereshi e-pfukwarupho unu iphemiphe; k'ophu unu a-maru ge mu eje iya. <sup>22</sup> Noo g'o shitaru mu nodu ezi iya g'o byapfuta unu; k'ophu oo-koru unu g'anyi eme ala; g'obu eshihukwanu unu ike.

<sup>23</sup> Ge Chileke, bu Nna; me Nnajiuphu bu Jizosu Kereshi mekwaa g'ehu du unube unwunna guu; mekwapho g'unu yee nwibe unu obu; l'o mekwapho g'unu kweta nkiya. <sup>24</sup> Ge Chileke mekwaarupho unu eze-iphe-oma; unube ndu yeru Nnajiuphu anyi, bu Jizosu Kereshi obu; yee ya k'ojeje. Nokwa g'o du.

**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d